

佛說月喻經

宋西天三藏朝奉大夫試光祿卿傳法大師施護奉詔譯

如是我聞一時世尊在王舍城迦蘭陀竹林精舍與苾芻衆俱是時世尊告諸苾芻言如世所見皎月圓滿行於虛空清淨無礙而諸苾芻不破威儀常如初臘者具足慚愧若身若心曾無散亂如其法儀入白衣舍清淨無染亦復如是諸苾芻又如明眼人或入大水深廣之中或涉江河險惡之處或履山巖高下之所以明眼故而悉能見離諸疑懼如前

所說苾芻亦然諸苾芻今我所說猶月行空清淨無礙譬如明眼人涉履諸險離諸疑懼而迦葉苾芻不破威儀常如初臘者具足慚愧若身若心曾無散亂如其法儀入白衣舍清淨無染離諸怯懼亦復如是爾時世尊復告諸苾芻言汝等苾芻若入白衣舍時當起何心當以何相而入其舍諸苾芻白佛言世尊佛是所歸向佛爲諸法本佛爲清淨眼我等不知是義云何願佛世尊善爲宣說令諸苾芻聞已了知佛言諸苾芻汝等諦聽當善作

意今為汝說若諸苾芻欲入白衣舍時應起
無著無縛無執取心依律儀相而入其舍雖
受利養但欲為彼作諸福事隨自所得分量
而受復善作意欲自不高於他不下起如是
心以如是相應入白衣舍爾時世尊舉手捫
空告苾芻衆言於汝意云何虛空有著不有
縛不有執取不諸苾芻言不也世尊佛言若
苾芻以無著無縛無執取心入白衣舍亦復
如是爾時世尊又復舉手捫空告苾芻衆言
諸苾芻於汝意云何虛空有著不有縛不有

風六

十六

執取不諸苾芻言不也世尊佛言迦葉苾芻
亦復如是以無著無縛無執取心入白衣舍
雖受利養但欲為彼作諸福事隨自所得分
量而受復善作意於自不高於他不下諸苾
芻以是義故如迦葉苾芻者應入白衣舍堪
受利養爾時諸苾芻重白佛言世尊若諸苾
芻為白衣說法時或有清淨或不清淨其事
云何願佛世尊善為宣說佛言諸苾芻汝等
諦聽當善作意今為汝說若苾芻為欲令他
發起信心及作信心事給施衣服飲食坐卧

之具病緣醫藥以是利故為他說法者此不
清淨若苾芻於佛所說法安住正見離諸染
污如鍊真金去除鑛穢見如是法證如是法
如佛所發起是法能離生老病死憂悲苦惱
以如是法為他演說令他得聞如是法已隨
順修行於長夜中得大利樂以此緣故發生
慈心悲愍等心由是因故令佛正法得久住
世諸苾芻若起如是心為他說法者斯則清
淨復次諸苾芻汝等當知迦葉苾芻能起清
淨心為他說法以清淨故令佛正法得久住

風六

十七

世是故汝等諸苾芻眾亦應如是如理修學
又諸苾芻若有能起如是心為他說法者我
說名為最上清淨真實能令如來正法得久
住世佛說此經已諸苾芻眾歡喜信受
佛說月喻經

佛說醫喻經

宋西天三藏朝奉大夫試光祿卿傳法大師施護奉詔譯

如是我聞一時世尊在舍衛國中與苾芻眾
俱是時世尊告諸苾芻言汝等當知如世良
醫知病識藥有於四種若具足者得名醫王